



03942

張燕公集卷六

唐 張



頌
太古厥初遺文闕矣書祖二典聿陳五教唐虞之訓歷

代宗焉孰同理而不休奚同亂而克遯皇唐之興也道
積四聖時將百年澤浸生人自根流葉孝和晏駕嗣子
幼冲凶臣嬖女蹙弱王室人甚崩角之危朝深綴旒之
歎賴天獎忠勇大戮鯨鯢尊文廟而安神清帝宮而待

張燕公集

卷六

一一

聖少主奉天命以至禪皇上拒天命以固違羣公卿士
胥進曰陛下孝弟之至歷數在躬處儲闈有讓元子之
德居藩邸有辭太弟之高六合欣戴三靈允協為天下
君其誰與讓皇帝義不得已曰吁所憂之長也乃被帝
服陟元后延羣臣見兆人是日也景雲至茲歲也戎狄
來其尤祥極瑞雜沓異類蓋翫狎而不記矣上方謹庶
務覽衆則履乾乾懷翼翼遊道德之靈囿從鸞鷲之珍
羣視天下之所不見聽天下之所不聞帝典皇綱於斯
備矣宜定效報之禮革封禪之則答神貺揚元德不然

者則二宗無類帝之壇五岳無省方之官矣若夫湯頌傳於考父大什著於周公臣下之志不可闕也敢作頌

曰

天祚聖唐啓我明主大哉皇帝與天同矩天乎蓋之地乎載之陽和化育懷生賴之孝乎惟孝告成於天靈壇神岳思皇嘏焉皇哉皇哉胡可捨旃大君受命景雲來翔流天汎日爛漫成章稽諸瑞典昔祚軒皇而今表聖主德以昌西戎遠國畏君之靈古稱卽序今乃來庭帝女是降其從如星天人偃革以迄太寧邊兵徂獷狃於征伐帝初歷試護彼窮髮懷哉好音稽顙天闕遐哉大同天子之功

上黨舊宮述聖頌

維開元十有一祀正月皇帝展儀於河東挾右太行留宴上黨整兵耀武入於太原設都建頌以崇王業南轅汾隴祈穀后土天清日潤神歆如荅三月庚午飲至長安六軍解嚴四方和會邇觀法象遐咏德澤大虞巡之典修美漢祠之禮舉人心翕而一變神物效而無方於是邠王臣守禮寧王臣憲申王臣範薛王臣業獻書於

內開府儀同三司臣懷尚書臣峻臣象先臣頌御史大夫臣灌抗疏於外僉曰陛下受天歷數稽聖典謨道貫三靈仁育萬類掃陰沴而覩日開闢之功也尊文考而御天帝王之孝也天以陛下爲子人奉陛下爲君萬殊之福祈應畢臻三代之風頌聲咸作今潞人懷代郎詠泗亭採聖崖延立石將表潛龍之館勒啓聖之圖勤亦至矣陛下推而不報其何以下塞衆望上對神休哉臣聞天之所啓人之所戴必憑睿聖元懿之德元命眞符之紀功業見乎變德施加乎時德厚者施溥功元者應

張燕公集

卷六

三

速或階晦以彰或由難而昌蓋生其德之謂天授其時之謂命天有成命其可沒乎陛下昔居是州也紫雲在天神光照室白鹿來擾黃龍上昇隴山仙洞而神魚躍山開禪穴而靈鐘韻謠言合識巨迹引途嘉李傍連神著自起當此時也金石預變獄頌先歸政殷六府人重五教陶無慮器漁有讓泉神而化之仁不知力昔龍負圖而大舜登狼銜鉤而后殷昌元圭錫於夏禹赤伏歸於漢光猶言先運吐符希代稱寶未有窮祥極瑞佩儼瓌異如今之至者矣若元凱集而不彰則神心不悅鴻

業成而不贊則祝告無聞是掩天休而蓋聖德也臣子
之罪將何解焉願聽潞人以揚丕烈帝曰往者中宗違
代國步維艱天祚我唐大命集于睿宗大聖真皇帝朕
畏天將命不敢怠違其敢符坤珍皆先聖之餘福朕何
力之有焉然重違昆弟公卿之請抑以敬從無爲虛美
重朕不德也羣臣遊聖蕩莫能名約乎舊史敢頌成績
曰

帝德廣運乃聖乃神天祚聖兮唐雖舊邦其命惟新再
受命兮帝初正人降居上黨天下往兮黃龍晝見攀天

張燕公集

卷六

四

而上九五象兮帝適於野紫雲之下求必在兮帝寢於
堂變龍有光觀者駭兮天跡星謠水連著立摠神異兮
靈鍾化穴縞鹿赤魚可詭異兮上天無聲託類附形覺
悟人兮聖皇齋粟在得戒失昭事神兮幡幡潞老樂我
王道愛舊宮兮赫赫頌功與天比崇據無窮兮

在潞州祥瑞頌十九首奉勅撰

日抱戴

皇帝初臨潞州景龍元年四月二十有七日其日日抱

戴頌曰

日告帝符王起乘土重光五色四方之主或抱或戴氣
華暉嫵大明經天豈忘忠輔

月重輪

皇帝臨潞州景龍元年七月十有四日夜月重輪頌曰
維帝潛德受天眷命月之重輪示我金鏡璧彩內澈環
規外映君心用明神道協慶

赤龍

皇帝臨潞州景龍二年四月二十有五日晚事據按假
寐百姓白鶴觀道士宋大辯等三十餘人同見赤龍

張燕公集

卷六

五

案頌曰

聖寐無體神融氣渙蛻然赤龍垂首據按昔有王媪預
覩興漢今此潞人亦兆靈觀

逐鹿

皇帝景龍二年二月二十有八日巡屬縣至潞河有鹿
奔走渡河水深三丈帝馳鞭逐鹿水不及馬韉應時獲
鹿司戶叅軍崔弼隨帝而涉纜入數步馬溺焉頌曰

王者之收必有天佐逐鹿深水乘躍而過不失其馳舍
矢如破後騎沒溺乃驗靈跡

嘉禾

皇帝臨潞州景龍二年八月二十有五日長子縣界內有嘉禾合穗頌曰

靈氣滋液嘉禾族生或分九穗有合雙莖昔効唐叔歸功太平今於歷試抽此德萌

黃龍

皇帝臨潞州景龍二年九月五日黃龍見於州城東五里伏牛山南崗遲留久之觀者如堵頌曰

黃龍土精五方之長在田而見文明厥象軒圖瑞來夏

張燕公集

卷六

六

賈妖往惟德可應恃神難調

羊頭山北童謠

皇帝臨潞州景龍二年九月已後嘗有童謠云羊頭山北作朝堂其州南六十里有羊頭山頌曰

熒惑降精是爲天使會合齟齬謳謠街市通賢妙識採斷來事山北朝堂此名天位

仙洞

皇帝臨潞州襄垣縣北有仙洞忽然自開十數里仙乳靈液凝膏注玉頌曰

憑乘山穴應吳建號襄垣洞開神亦我報玉膏滴瀝石
巷幽奧天將祐之陰靈啓道

大王山壘

上黨記禹治水而登此山因名焉魏書云望氣者言其
山有天子氣故太武壘石爲三封欲以厭之頌曰

昔望茲山當出天子太武心忌壓以軍壘地氣雖廢河
清有俟三百餘年聖人方起

疑山鑿斷

上黨記後魏太和末孝文帝自代幸洛見此山有伏龍

張燕公集

卷六

七

疑而不進遂斷山東麓以厭之其斷處猶存因名疑山
頌曰

王命必有厭勝多無不徵緣錯處役丹徒舊山伏氣今
聖靈符魏雖穿鑿能違天乎

赤鯉

皇帝景龍三年三月巡屬縣至襄垣南漳水上有赤鯉

魚騰躍頌曰

龍或魚服鯉同國姓躍泉將飛告我天命鱗昭武德翼
贊興慶昔去隨仙今我迓聖

黃龍再見

皇帝臨潞州景龍三年六月十五日黃龍再見於伏牛山頌曰

蜿蜿黃龍既見將躍氣動雲繞精流電爍文明剛健嫵媚纖弱萬物覩焉聖人其作

紫雲

皇帝臨潞州景龍三年九月九日與羣臣壺口山界坐其時東北有紫雲翩翩而來光彩照日明日上黨縣丞王敬賓等白刺史劉懷一并啓皇帝請上狀奉教不許

張燕公集

卷六

八

頌曰

天臨壺口露座山眉紫雲來覆如蓋如帷畢景不減含風自持一人有慶兆民賴之

李樹

皇帝臨潞州延唐寺有李樹連理皇帝親自驗見之御書額焉頌曰

李興帝族寺勝延唐異枝同幹雙名合祥花轉瑤萼子綴珠光本支百代永永蕃昌

神著

皇帝臨潞州景龍三年九月十有五日照百姓韓擬禮
著筮卦未成一著翹立擬禮曰此天人之瑞洎帝踐
阼授擬禮遊擊將軍長上折衝頌曰

織織靈著下有伏龜天生神物以決狐疑一著特起自
天立之無卦之卦告帝之期

金橋

金橋在潞南二里常有童謠云聖人執節度金橋皇帝
景龍三年十月二十有五由此橋朝京師頌曰

出郡二里橫路金橋聖人南度駟馬西朝運及誅呂時

張燕公集

卷六

九一

當換堯却尋後事一合童謠

紫氣

皇帝臨潞州景龍三年十月二十有五日照京後州內
所居寢堂有紫氣七日不散頌曰

王往京國傾城戀惋紫氣浮宮七日不散斐齊牕戶輪
困臺觀都人係心瞻仰雲漢

大人跡

皇帝從臨潞州還京後其宅內及州街並有大人跡長
二尺五寸自東而西布武相繼頌曰

百神從王一舉西適衆觀空解連步雲迹躡似郊媒痕
同雷澤曠古奇事存乎帝籍

神人傳慶

皇帝唐隆元年六月二十日夜除妖孽後其明日州佐
吏索崇嗣於州南門外聞空中有人云臨淄王誅韋氏
相王得天下其崇祠告長史裴思裴思以妖惑罪之禁
錮累日逢其月二十一日赦到獲免業牘猶存頌曰
天帝下席承韋於命王赫斯興撥亂反正擊凶尊主一
麾大定神人相歡胖蠻傳慶

張燕公集

卷六

十

開元正歷握乾符頌

宥有嘲臣曰聖主正新歷握乾符百寮賡歌以美時六
合鼓舞以頌德先生獨宴默書閣含翰詞林奚其爲儻
儻也臣應之曰斗水不能評巨壑之量隙光未足議大
明之體何者見褊而守隘也握乾符者不謂執天命與
執天命者非夫廣德休歷交相表裏況命者夫子之所
罕言也焉可偏贊而總握符之盛哉如作者略大本舉
小節不亦仲尼之門所聽營也是以洞思乾慮久難其
述客無異焉客曰請終餘論粵若我大唐慶始白雲道

昇紫氣屬漢東失馭淮南不返高祖舉晉陽之甲撤定
關西太宗因僂后之師削平天下高宗收圖海外檢玉
封中九域黎人重代飲澤雖鳴鸞改號神龍中興周鼎
歸唐元圭祀夏中宗違代嬖孽窺國於是乎聖上起蕃
邸入鈞陳一麾水心羣凶泥首崇復大聖越踐少陽受
禪當宁而光大前烈垂統拜壁而慎寧後嗣四海有覆
孟之安百代無委裘之隙是之謂聖人握符之大寶也
四星入輔五將出禦倚禮樂爲國計仗仁義爲軍勢英
賢集殿而文教成干戚舞階而武功振敬讓光于九族

張燕公集

卷六

十一

孝慈行於萬宇積障西南渤海東北織皮火毳暘炎山
汚熱海向風來王黑貂駿浮天溟絕冰漢連歲獻款
鳥獸無猜人之意草木無不達之氣升中於天比天同
貴是之謂聖人握符之大政也歷試土黨黃龍飛天入
清中禁白虹指日瘞汾脍寶鼎見柴岱宗卿雲蔚非應
事而呈瑞者雖多狎而不紀矣是之謂聖人握符之大
祥也以數推氣以氣定朔以星殷時以閏成歲考星閏
而革疏度置歲差而辨誤日立大衍之紀參大渾之晷
合鍾律之聲極鬼神之情是之謂聖人握符之大歷也

若夫仁聖根於內菁華發於外祥兆祕於前謠讖灼於後自然之理也彼洛下閎者漢太初時一巧歷耳云後八百歲當差一日有聖人正之斯人也抑將露才揚術預證來聖有著舊之傳記無史策之明文然至隋之開皇及麟德聖歷三家創法一引爲徵約之年代則鄰近稽之圖籙則曖昧未有如新歷之昭昭者矣在昔唐虞之際以斗精受命者七人得四均間氣而生者又二十八人所謂三十五際者也禹以金德王故夏后之有天下也生數四百年契以水德王故殷人之有天下也成

張燕公集

卷六

五

數六百年稷以木德王故周人之有天下也成數八百年伯益之命中天而堯族以火德乘之故漢室之有天下也生數再及二百年其間距王而興不能復大禹九州之迹及勝殘百年之命者皆五神之餘氣也咎繇降德皇唐復興土精應王厚德載物生數五百成數千年命歷有歸此其大較修德增祥與天無窮轉算之徒莫能究也緯以八元三百四歲爲德運七百六十歲爲代軌千五百二十歲爲天地出符四千五百六十歲爲七精返初天人相應合若符節自堯典命羲和脩重黎之

舊理顛頊之厯上元甲子千五百餘歲得孔聖而春秋之厯序暨開元十二年甲子凡三千四十歲遇聖上而大衍之厯興是時也土德入生數之元天命當出符之會信矣伏惟聖上聰明文思道德之具也豁達大度皇帝之體也藝總六經漢光之學也文通三變魏祖之才也緣情定制五禮之本也洞音度曲六樂之宗也神于弧矢黃軒之威也聖於翰墨蒼頡之妙也兄弟善友王季之心也子孫衆多周文之福也大寶以定天位大政以布廣德大祥以合靈符大厯以啟成命德位兼才臨照如此符命介福榮章如彼所謂廣德休厯交相表裏之效也善厯者必推來運以自神興王者不俟往言以表聖設徵夫洛下閎之語也其不有容成之事乎且如時有命比於日孰是夏王之福也賴卜年衰其德豈謂周公之訓也故曰王者執天命在於俟天符致天符在於順天德布天德在於保天位四者備矣然後陳其盛德告於神明捨此道也胡可謂正天厯握乾符哉謏臣懵學謝生元造樂虞典之歌舜羨周詩之美文敢不敦信辭薦清樂厭止客之誚託衆篇之後云爾

維皇六葉於赫啟聖步玉斗握金鏡地維續天柱正山
川授方雷雨施令清廟九祀堯門百慶郊稷尊祖擇昌
定命德自我流藝從我脩龜易八卦龍書九疇文舍玉
律子吐金鈎鳴絲鶴舞調箭猿愁集賢勝殿花萼名樓
禱用外表事行先兆萬曰朝徹千心暗曉卿雲爛熳黃
龍窈窕遊姑射神人窅登太山天下小飛祥定鼎均靈
躋類鞮譯窮天採維盡地爍此金戟鑄爲農器匪直也
然探元索秘軸止輪運辰居星轉得一神凝吹萬情辨
發斂潛合晦明幽闡階冀朝開宮槐夜卷正我長厯同
符大衍天地清焉日月貞焉四時行焉萬物生焉窮神
知化美功成焉金版玉牒遠頌聲焉

起義堂頌

堯以天下禪舜舜以天下禪禹禹將宅百揆摠萬國一
讓於稷尚再讓於皋繇稷尚先舉彼商與周以之更盛
皋繇後天我國家于茲受命非舜以考天而疇咨審靈
命之陰隲非禹以享天而德讓知厯數之有歸及乎元
元間出光大前慶垂道德而統運依清虛而立法天祚
我李厥惟舊哉并州起義堂者皇天造帝之初高祖誓

張燕公集

卷六

西

衆之地也隋氏失御國亂無家小道自賢大才胥忌惟
宮室陂池之好惟沉湎暴慢是保上帝不歆黎人咸戚
六車踰海而東敗萬乘過江而南覆豺狼入邑獯豸爭
人黔首囂然方將無訴我高祖感之乃龍躍晉水鳳翔
太原百神前驅萬姓來奔開咸陽入天門用湯武之兵
靜新室之亂遵唐虞之典承太王之基率百官受終于
文祖輯五玉班瑞于諸侯類圓禪方之禮封功爵德之
議允約法惟簡代虐以寬子惠困窮懷柔蠻貊金石一
變日月重華近古以來未有革命易姓若此之盛者也

張燕公集

卷六

五

非天私我有唐惟天祐于積德非唐求于人庶惟人懷
于累仁當此之時太宗內啟聖謀外行專斷躬擐甲胄
跋履山川駕英雄而爲奧主一區域而定大業周詩曰
昊天有成命二后受之信今之謂也若夫脩德以降命
奉命以造邦原濬者流長根深者葉茂天人報應豈相
遠哉觀周之興始於后稷公劉承以太王王季皆勤儉
忠厚克廣前烈至于文王成之武王啟之康王安之故
卜世三卜年八百天所命也我唐之興也始於稟祿
元元承以景皇元帝皆立言邁德垂裕後昆至于高祖

受之太宗有之高宗守之中宗復舊業睿宗新景福比
之周室我何謝焉且如陳德明刑庶其躬稼之績元宗
道要小其避狄之仁化流率土狹其江漢之域義寧大
朝羞其牧野之戰故武德中太行出大聲曰唐興理萬
年蓋天之所命年代未可涯也仲尼曰惟天爲大惟堯
則之又曰韶盡美矣又盡善也非至德其孰能如此其
大者乎於戲先后捨元子而立子主鬯煩大位而付子
天下自高祖創業百有六戰欽承丕緒十有四載東西
南北無思不服山川鬼神亦莫不寧實惟藝祖儲福之

張燕公集

卷六

六一

所致豈予幼孫菲德之所及方將運心于元妙之境厲
志於造化之爐發令爲祥符施惠爲霖雨任賢爲兩曜
仗能爲四時俾天之下有形者遂全懷生者自足樹鋪
野繭田種嘉穀斷雕爲樸捐珠棄玉追大庭而齊風夢
華胥而同俗非曰能爾願宗祏而效焉癸亥之歲獻春
正月濟河橫汾省方展義存問黎老緬慕本邦城郭歸
然桑梓如舊覽風物之憂思尋玉業之艱難惟高祖若
天地之開闢化成萬類惟太宗若日月之照臨光于四
表舉晉陽之甲除君側之盜由唐侯之封升天子之號

肇基發迹實在于茲仙駕無所或顧懷於舊土靈魄無
方儻來歸於北堂郡縣之所宜嚴奉前人有言曰禮不
忘本樂殊其德如姬詠周原而劉歌沛邑思我烈祖如
聞歎息之音嗟爾後人無忘成功之頌頌曰

皇矣上帝臨下有赫降監四海求人之瘼吁彼隋煬其
政不獲眷我高祖此惟其宅天輔臯陶明刑弼教道遵
老氏同元體妙仁表四孔明燭獨照隨父託心史良辨
貌高祖誕靈神光夜耀天妹作合日見夢紹祚生文帝
膺運會昌首唱高祖騫飛晉陽萬夫一心元戎啟行火

張燕公集

卷六

七

旗炎炎雲鳥洋洋五星迓帝萬國謳唐天網恢疎王師
節制威惟連戮老生摧斃山祗引軍河龍渡帝涓倉散
積離宮弛閉關輔來蘇遠方咸惠長安宮室上法太微
隋遷寶鼎唐在璿璣伏人雙闕詔出九圍三靈協載百
祿同歸帝謂太宗表正封略濤蕩颺掃寔馳電爍劍不
摧鋒弩無再曠西平汧隴東取河洛杲密德充頭懸面
縛北走獯鬻南達蠻荆遼碣作父梁岐底平風動神行
海隅蒼生莫不來庭於昭義堂誓衆資始天命所起于
胥頌美維予小子夙夜敬止於戲皇王緒思不忘

張燕公集

卷六

六

臣錢開仕恭校

臣錢開仕恭校

張燕公集卷七

張

張

撰

頌

大唐祀封禪頌

皇唐六葉開元神武皇帝再受命致太平乃封岱宗禪
社首鑿石紀號天文煥發儒臣志美立禡廟壇曰厥初
生人淑有羣臣其道茫昧其風朴略因時而歛起與運
而紛落泯泯沒沒無聞焉爾後代聖人取法象立名位
衣裳以等之甲兵以恒之於是禮樂出而書記存焉反

張燕公集

卷七

一

其源致敬乎天地報其本致美乎鬼神則封禪者帝王
受天命告成功之謂也閱曩聖之輿訓攷列辟之通術
疇若天而不成曷背道而靡失由此推之封禪之義有
三帝王之略有七七者何傳不云道德仁義禮智信乎
順之稱聖哲逆之號社悖三者何一位當五行圖籙之
序二時會四海昇平之運三德具欽明文思之美是謂
與天合符名不死矣有一不足而云封禪人且未許其
如天何言舊史者君莫道於陶唐虞舜臣莫德於臯陶
稷尚三臣備德皆有天下仲尼敘帝王之書繫魯秦之

誓明魯祀周公用王禮秦承伯益接周統聖孔微旨不
其效歟然秦定天下之功高享天祿之日淺天而未忘
庭堅之德也故大命復集於皇家天之贊唐不惟舊矣
其興之也元靈啓迪黃祇顧懷應歸運以義舉撫來蘇
以利見渡也無放夏之慙武也無伐殷之戰高祖創業
西宗重光有德格天漏泉蒸雲濡露菌蠢滋育氣氳漸
煦若天地之覆載日月之照臨溥有形而希景幣無外
而宅心百有八年於茲矣皇帝攘內難而啓新命戴睿
宗而纘舊服宇宙更闢朝廷始位蓋義軒氏之造皇圖

張燕公集

卷七

二

也九族敦序百姓昭明萬邦咸和黎人於變立土圭以
步歷革銅渾以正天蓋唐虞時之張帝道也天地四時
六官制禮井田三壤五圻成賦廣九廟以尊祖定六律
以和神蓋三代之設王制也武緯之文經之聖幕之神
化之然猶戰戰兢兢日慎一日納規誨以進德遂忠良
以代工講習乎無爲之書討論乎集賢之殿寵勇爵貴
經門翼乎鸞鸞之列在庭毅平貔貅之師居鄙人和傍
感神寶沓至乾符坤珍千品萬類超圖溢牒未始聞記
我后以人瑞爲心初不以物瑞爲異王公卿士儼然進

曰休哉陛下孝至于天政合乎道前年祈后土人獲大
穰間歲祀圜邱日不奄朔祥感以祈聖因事以觀天天
人交合其則不遠意者喬岳掃路望翠華之來上帝儲
恩俟蒼璧之禮久矣焉可專讓而廢舊勛羣臣固言勤
帝知罪至于再至于三帝乃揖之曰欽崇天道俯率嘉
話恐德不稱敢憚於勤其撰巡狩之儀求封禪之故旣
而禮官不戒而備軍政不謀而輯天姥練日雨師洒道
六甲按隊八陣警蹕孟冬仲旬乘輿而出千旗雲引萬
戟林行霍漢燐爛飛飀揚精原野爲之震動草木爲之

張燕公集

卷七

三

風生歷郡縣省謠俗問百年舉百祀興墜典葺闕政攸
徂之人室家相慶萬方縱觀千里如堵城邑連歡邱陵
聚舞其中垂白之老樂過以泣不圖蒿里之魂復見乾
封之事堯雲往舜日還神華靈鬱爛漫乎穹壤之間是
月來至於岱宗祇祓齋宮滌濯靜室凝神元覽將款太
一議夫太山者聖帝受天官之宮天孫總神靈之府自
昔立國莫知萬數克升中而建號惟七十而有五我高
宗六之而今七矣非大尊位盛時明德曠代遼濶難併
之甚哉先時將臻夫大封也累封疆于高岡築泰壇於

陽趾夫其天壇三襲辰陛十二咸秩衆靈列座有次崇
牙樹羽管磬鏞鼓宮懸于重墜之內千戚釵及鉤戟戣
戩周位於四門之外伐國重器傳代絕瑞旅之於中庭
玉輦金轂翠冑黃屋夾之於端路庶官百僚羗夷蠻貊
褒成之後讓王之客序立於禮神之場髦頭弩牙鐵馬
金鏃介冑如雪旗幟如火遠匝於清禁之野於是乎以
天正上元法駕徐進屯千乘於平路留羣臣於谷口皇
帝御六龍陞萬仞獨與一二元老執事之人出天門臨
日觀次清瀆宿嶢岩赤霄可接白雲在下庚寅祀高祖
張燕公集

卷七

四

於上封以配上帝命衆官於下位以享衆神皇帝冕裘
登壇奠獻俯僂叶金奏佾羽舞撞黃鐘歌大呂開闔闔
與天語清將信公奉斗布度懋建皇極勤恤蒼生招嘏
乎未兆禳災乎未萌上下傳節而禮成樂遍福壽同歸
而帝賜神策乃檢玉牒於中頂揚柴燎于高天庶忠誠
之上達若憑烟而駕烟日轡方旋神心餘眷五色雲起
拂馬以隋人萬歲山呼從天而至地越翌日尊睿宗侑
地祇而禮社首遂張大樂觀東后國風惟舊無黜幽削
爵之誅王澤惟新有眚災大賚之慶不浹日至化洽於

人心不崇朝景福遍於天下然後藏金匱於祔室迴玉鸞於上都煌煌乎真聖朝之能事而高代之盛節者也于斯之時華戎殊俗異音同歎曰兵合多雨山峻多雲豈有大舉百萬之師克期千里之外及行事之日則天無點翳地無纖塵嚴冬變爲韶熹寒谷鬱爲和氣非至德其孰能動天如此其順者乎昔人云自西自東自南自北無思不服今信知聖人作而萬物覩其心服之之謂矣或曰祭泰祈主先后非禮歟曰是禮也非宜也王者父事天母事地侑神崇孝無嫌可也且夫柴瘞外事帝王主之蒸嘗內事后妃助之是開元正人倫革弊禮起百王之法也故令千載職末光聆絕韻咀甘實漱芳潤爍元妙之至精流不已之淑聲臣說作頌告於神明四皇壇而六帝典雖吉甫亦莫能名徒採彼輿人之詩曰大矣哉維天爲大惟皇則之率我萬國受天之禘子孫百代人神共保綏之云爾而已矣

大唐開元十三年隴右監牧頌德碑奉勅撰

周禮校人掌玉馬之政天子十二閑馬六種閑爲一廐馬二百一十六應乾之策也六廐成校五良一駑是之

謂小備校有左右閑成十二合月之道也。駑馬三良馬之數，凡三千四百五十六，是之謂大備。秦并一海內，六萬騎之國馬盡歸之。帝家則周制陋矣。漢孝武富文景，儉約之積，雄衛霍，張皇之勢，勒兵塞上，廐馬有四十萬匹。及東漢魏晉國馬，陵夷不可復逮。武帝時矣。後魏以胡馬入洛，蹴踏千里軍陣之容，雖壯和鑾之儀，亦闕大。唐接周隋亂離之後，承天下征伐之弊，鳩括殘燼，僅得牝牡三千，從赤岸澤徙之隴右。始命太僕張萬歲葺其政焉。而奕世載德，纂脩其緒，肇自貞觀，成於麟德，四十年間，馬至七十萬六千匹。置八使以董之，設四十八監以掌之。跨隴西金城平涼天水四郡之地，幅員千里，猶爲狹隘。更拆八監布於河曲豐曠之野，乃能容之于斯之時。天下以一縑易一馬，秦漢之盛未始聞也。張氏中廢馬官亂職，或戎狄外攻，或師圍內寇，垂拱之後二十餘年，潛耗大半。所存蓋寡。開元神武皇帝登大寶，受靈符水，瑞感而河龍出，星精應而天駟下。二年春，帝乃簡心膺善畜之將，卜福祐宜生之長，俾領內外閑廐使焉。卽開府霍公，其人也。公名毛仲，姓王氏，開元佐命之元

勲東國亡王之後裔四伯輔禹與治水之謨四七興漢
在經星之列清明虛受察含冰鑑籌謀先覺慮出著龜
竭無私之忠而善歸天造輸不懈之力而玄向日用故
騰躍風雲攀附日月策功第一承恩莫二庭羅魏絳之
鐘鼓第賞堂邑之山林文馬蕃錫於晉侯御衣亟分於
韓信庶姜如王則降榮彤管衆子垂髻則抱拜朱芾聖
人之見也必猶爾爲之四顧而滿志聖人之不見也乃
恤然若無與樂其天下仲尼所謂是必才全而德不形
者也夫其處身則立無跂正也視無還端也聽無聳誠

張燕公集

卷七

七

也言無遠視也國有憂未嘗不戚國有慶未嘗不怡其
御下則明利害之鄉阜財求之務使之趨善而避惡懷
德而畏威身不離於闕庭令遠行於坵牧亦有不學而
暗合於古未更而懸辨其事然其從政必問於遺訓而
資於故實者也若夫春祭馬祖夏祭先牧秋祭馬社冬
祭馬步敬其本也日中而出日中而入禁原棧牧除葶
釁殿時其事也潔泉美薦房凉棧濕翹足而陸交頸相
靡宣其性也攻駒教駢講馭臧僕刻之剔之羈之策之
就其才也不反其性故親人樂藝節樂如舞之心自生

中郎將兼鹽州刺史鹽州監牧使張景遵隴州別駕修武縣男東宮監牧韋衡都使判官果毅齊琛摠監韋績及五使長戶三萬一千人僉曰自開府庇我十三年矣畜有婉息人無乏匱克厭帝心莫非嘉績且如亭西南兩使六頓八夫藁穀計八十萬工圍石以息人約費其政一也納長戶隱田稅三萬五千石以儉私肥公其政二也減太僕長支乳酪馬錢九千三百貫以窒隙止散其政三也供軍筋膠十萬七千斤以收絹繕工其政四也時苜麥苜蓿一千九百頃以芟蓄御冬其政五也使

張燕公集

卷七

九

監官料舊給庫物新秦置本牧分其利不喪正錢二萬五千貫以實府宜官其政六也賣死畜貯絹八萬匹往嚴道市麩僮千口以用滯足人其政七也五使長戶數盈三萬墾田給食糧不外資以勸農却輓其政八也敢問監牧之事孰能加于此乎然則稱伐計功前典所貴上以美聖主擇才之得人下以替忠臣受任之盡節末以道官屬承風之成事竟以示後代昭前之令聞是四烈者不可廢也旣而大君有命舊史書功吟咏瓌奇篆刻金石秦汧渺渺尚想非子之風魯野區區猶傳史堯

之頌試從此而觀彼夫何足以言哉頌曰

皇天考牧兮聖之君四十三萬兮馬爲羣塹汗渭兮垣隴坂飛黃卓兮昆蹄苑山崆峒兮水鳴咽泉噴玉兮草汗血聚如花兮散如雲性旣馴兮才亦絕維國家之大事駕時龍兮祭天地和鑾發兮文物備維皇帝之七德摠戎馬兮威萬國彩髦翻兮金介冑有霍公之掌政擇張氏之舊令天王駕兮仗黃麾太僕驂兮展輅儀舞月駟兮蹀雲螭神倜儻兮態權奇騏驥溢野兮牛羊日多子孫榮位兮恩寵如何頌皇靈兮象石鼓萬斯年兮羣

張燕公集

卷七

十一

玉府

廣州都督嶺南按察五府經略使宋公遺愛碑頌

維唐御天下九十有八載蒼生賁乎海隅元澤漫乎荒外天子念窮鄉之僻陋徼道之脩阻吏或不率不馴人或不康不若乃命舊相廣平公宋璟鎮茲裔壤式是南州篤五管之政教總三軍之旗鼓員萬里馴致九譯詔書下日靡然順風曷由臻斯威名之先路也公曩時執白簡登瑣闥推誠蹇諤不私形骸忤英主之龍鱗踰奸臣之虎尾挫二張之銳則聲恒寰域折三思之角則

氣蓋風雷由是極有四星維帝之輔地有五岳維天之
柱其入宰也君之股肱其出守也人之父母至於此邦
之長人也飲食有節衣服有常清心而庶務簡正色而
羣下一慙兮憫兮赫兮喧兮固以不怒而威不言而信
雖有文身鑿齒被髮儋耳衣卉麪木巢山館水種落異
俗而化齊言語不通而心喻矣其率人板築教人陶瓦
室皆塗墍書游則華風可觀家撤茅茨夜作則災火不
發棟宇之利也自今始祖國之船海琛雲萃物無二價
路有遺金殊裔胥易其廻途遠人咸內我邊郡交易之

張燕公集

卷七

十一

坦也有如此故能言之士舉爲美談蓋微子去殷以後
王者襄公伐楚將得諸侯尙書東漢之雅望黃門北齊
之令德宋氏世名公其濟美詩所謂無念爾祖聿脩厥
德廣平有焉若夫往者屈也來者伸也往來相召而哀
樂繼之鴻飛遵渚於汝信處龍章袞衣以我公歸鬱陶
乎人思嗟嘆之不足廣府司馬譚瓌番禺耆老某乙等
相與刻石傳徽斯文予春秋之徒也豈將苟其辭哉雅
敬宋公王臣之重次嘉譚子贊德之義遙感耆舊去思
之勤越裳變風知周公之才之美吉甫作頌見申伯于

藩于宣觀政將來惡可廢也頌曰

降王宰兮遠國靈歌北戶兮舞南溟酌七德兮考六經
政畫一兮言不再草木育兮魚鼈寧變蓬屋兮改籬墻
魚鱗瓦兮鳥翼堂洞日華兮皎夜光火莫炖兮風莫颺
事有近兮惠無疆崑崙寶兮西海財幾萬里兮歲一來
舟如島兮貨爲臺市無欺兮路無盜旅忘家兮扇夜開
越井岡兮石門道金鼓愁兮旌旆好來何暮兮去何早
曝牛牲兮菌雞卜神降福兮公壽考

龍門西龕蘇合宮等身觀世音菩薩像頌

張燕公集

卷七

十二

我聞上古有聖人心入羣有身包大空普觀察一切音
聲其名曰觀音菩薩日月有盡光明無際天地有終神
通不滅禮其形像隨願而成功稱其名號應時而獲果
龍門西龕等身像者此都人士思賢令蘇君之所造也
天下之大都有五而河洛總其中皇居之赤縣有二而
合宮是其一四隩輻湊萬商靡謬政頗財黠刑放寵祚
所由然舊矣故強毅臨之則攫斂燕擾虜虐不辜以拱
撲睚眦是稱辨吏寬厚處之則乾沒淫詭相詐莫禦以
息偃簡怠謂之風流其傷弊一也武功蘇君名頌字廷

碩隲右僕射邳國公之元孫今吏部尚書懷遠公之元
子相門華列儒庭善訓雍容文雅當代知名通才博藝
於何不可御史天憲也抗執簡之雄郎官星象也高握
蘭之選帝車西幸皇春東遙四方之極一臺歸妙蘇君
於是乎始爲政於京邑籍田戶以衍賦徹考資蓄以程
力任重進逃以業浮庾詰姦慝以豫焚發制事典以示
好惡敦術學以興禮義省法罪獄吏無作威煦郵駟圉
人不敗產加以躬親足以勵勤謀始足以作則端莊足
以易暴清儉足以息貪夫如是簡往而事行正身而人

張燕公集

卷七

七

慕輕薄束修而歸厚流亡襁負而來復曾未朞月遷給
事中旣而人更父老聚而謀曰咨休哉明府之惠人也
春風暢之時雨露之心乎愛矣何以祝之朝廷豈不念
下民之鬱陶乎奚其爲奪我君而不省留也詩曰愷悌
君子神所愛矣庶幾乎三珍依憑百祥臻降云爾乃購
奇匠倣靈峰追琢鏡光鏡鑿電燧倚高壁臨懸關踏石
酌戴珉鬘縹緲雲聳嬋娟玉立摸宰官之形儀現輪王
之相好諦視瞻仰將莞爾而微笑攝心傾聽疑憊然而
有聲其左右則福地園林香城基址前佛後佛大身小

身亘岑嶺而相望遍虛瑩而無數此身不動觀大地之
衆生彼佛無來見河沙之世界爾其北對宮觀南馳荆
越闕路豁開而中斷伊水逶迤而長注脩途交會車馬
川流帝城風俗是焉游覽如鎮南之峴山似關西之灞
岸暮春桃李上巳清明汎法池之淥波憑靜域之丹檻
揚袂陰景躡步震山花散四天香開八國以不居之歲
月閱無窮之人代知妙容之常在觀永劫之因緣盛德
相傳與此山而終始不其偉歟昔孔子化中都攝魯
相卓茂理于密以致漢治夫樹善有基建功無小蘇君
張燕公集

卷七

丙

春秋鼎盛德業日新方欲驥首天池整翮雲漢致大君
於堯舜紹層構於韋平是宰也故以五輅之推輪九域
之覆簣已重宣此義而說偈曰
大哉元聖心如明鏡深入禪定龍飛清淨觀我佛性靈
相珍飾精窮妙極千崑之側因空見色登我願力不競
不綵不剛不柔敷政優優百祿是道侑我蘇侯

劉鳳誥恭校

張燕公集卷八

唐

張

說

撰

贊

蒲津橋贊

易曰利涉大川濟乎難也詩曰造舟爲梁通乎險也域中有四瀆黃河是其長河上有三橋蒲津是其一隔秦稱塞臨晉名關關西之要衝河東之輻湊必由是也其舊制橫緇百丈連艦十艘辨脩竿以維之繫圍木以距之亦云固矣然每冬冰未合春洹初解流澌崢嶸塞川而下如礧如臼如堆如阜或攬或捥或磨或切縷斷航破無歲不有雖殘渭南之竹仆隴坻之松敗輒更之罄不供費津吏成罪縣徒告勞以爲常矣開元十有二載皇帝聞之曰嘻我其慮哉乃思索其極敷祐於下通其變使人不倦相其宜授彼有司俾鐵代竹取堅易脗圖其始而可久紓其終而就逸受無疆惟休亦無疆惟恤於是大匠藏事百工獻藝賦晉國之一鼓法周官之六齊飛廉煽炭祝融理爐是鍊是烹亦錯亦鍛結而爲連鑠鑠而爲伏牛偶立于兩岸襟束於中潭鑠以持航牛

張燕公集

卷八

一一

以繫纜亦將厭水物奠浮梁又疏其舟間畫其鷁首必
使奔斯不突積凌不隘新法既成永代作則原夫天意
有四旨焉濟人仁也利物義也順事禮也圖遠智也仁
以平心義以和氣禮以成政智以節財心平則應諸百
神矣氣和則感生萬物矣政成則又文之經矣財節則
豐武之德矣故天將儲其禎地將阜其用人將盈其力
聖皇之道乾乾翼翼觀藝而無窮詠功而無極

皇帝馬上射贊

第一

張燕公集

卷八

二

甘泉頓射飛野鷄一隻走狐二走兔十四不隔箭連中
五隻

一面昭仁三驅示武走則發射伏則不取

第二

中鷹前兔

寒兔滅沒疾鷹逞巧鳴鏑洞飛失雉亡狡

第三

福陽傾同日中尙前兔

狡兔雉犬力奔勢迫持圓驟飛捨拔先獲

望賢頓停日射高飛鴈一隻走驪二走兔三十六不隔
箭連中五隻

獸窟山豪鳥落雲雉貫三疊兩血不濺刃

望賢頓中獾狐

夜鳴之鳥是謂獾狐除人之惡應箭而鋪

望賢頓隔馬射中驪

趨趨牙驪寒草全色隔馬白步一縱而側

第四

仙游頓中驪一走狐三走兔十八不隔箭連中八隻

張燕公集

卷八

三

天子省斂薄狩岐陽躬射五十以奉蒸嘗

第五

文山頓射驪不隔箭連中二走狐一走兔二十一隻

我將獻鮮從禽於野一日百中以威天下

第六

武停頓向後射走兔其中射兔十九隻不隔箭連中十

一隻走狐三走驪二

霜兔斗迴雲龍矯過天旋月滿捨矢如破

第七

仙林頓分驥射野狐中

有芄者狐起帝之右分驥遠發應踏于手

第八

鶴子搦鷗不着飛過在後箭射應弦而落

鷺鷥上飛鷺集橫搏矯箭爭中紛然旋落

第九

一箭中兩鹿橫貫走五十餘步方倒

雙鹿並出一箭橫貫上思陵寢以獻時鮮

第十

張燕公集

卷八

四一

是日還宮苑內用大箭射走鹿四十口分賜諸王郡王及從人等

帝入靈囿數百麀鹿射其四十頒諸羣牧

孔子堂杜預贊

猗歟杜侯發揮孔聖春秋旣立王道以正列國行事君子莫之他人有心予忖度之推凡見例定罪原詞開我後學從祀先師

金紫光祿大夫太常卿上柱國中山郡公崔日知

寫真圖贊

廓哉中山靈宇廟徹逸韻豪爽達音妙絕孝盡思成忠
全見節優游宮侶蕭條禪悅白髮傳貌青松拂雪要之
歲寒是望邦傑

盧舍那像贊

并序

詩云哀哀父母生我劬勞欲報之德昊天罔極是傷不
可止也戀而懷無所及之感其有飾聖以資親修法以
展慕豈非孝子持明之心哉武擔山靜亂寺盧舍那丈
六鐵像者沙門履徹爲先妣用無價黃金之裝也徹師
俗姓劉氏青城真人知古之弟道門釋種守律護戒了

張燕公集

卷八

五

如來廣大之心達如來加持之力見虛空界翻繖茶壇
知定慧手結金剛印過去不悟因後行而追福當來未
聞指前緣而證道觀佛相者成一切智承佛光者壞無
始業張說聞其事而憚之乃合掌西南遙禮偈曰
大雄盧舍那妙法甚深秘神變加持力普昇不動位孝
哉彼沙門愛母而錫類法財裝妙色空色不相異慧日
破金山慈光觸寶地善來金剛手一一見佛事

般若心經贊

萬行起心心人之主三乘歸一一法之宗知心無所得

是真得見一無不通是玄通如來說五蘊皆空人本空也如來說諸法空相法亦空也知法照空見空舍法二者知見復非空耶是故定與慧俱空中法立入此門者爲明門行此路者爲超路非夫行深般若者其孰能證於此乎秘書少監駙馬都尉榮陽鄭萬鈞深藝之士也學有傳癖書成草聖酒揮洒手翰鐫刻心經樹聖善之寶坊啟未來之華葉佛以無依相而設法本不生我以無得心而傳今則無滅道濟文字意齊天壤國老張說聞而嘉焉讚揚佛事題之樂石

張燕公集

卷八

六

藍田法池寺二法堂贊并序

法池西三歸院二法堂茲寺長老初上禪師所造也禪師本姓彭名至知至性篤孝執親之喪七日不食微言密行志道探玄究易老莊太一之旨善正書與鍾王同格其精至點畫宛秀毫縷必見如折槁荷磨文石筋理灑颯固非人力所致也中朝名士山藪高尚法流開勝遠近慕焉及晚年專意於禪誦平生藝業脫若遺塵矣常嘆曰帝王父母許我出家雨露生成恩猶一揆依如來教創是功德萬一乎獻福二宮潛祐七祖將與一切

咸登道場於是三歸堂以長安元年辛丑子月望日癸未立善法堂以開元元年癸丑丑月望日戊辰建禪師母弟仁琬弟子沙門啟疑及沙彌令哲左右斯業寔有力焉

三歸堂贊

敬告諸佛子一心清淨觀欲求真正道當從信根入是佛虛空相是法微妙光定慧不相離是僧和合義人空法亦空二空亦復空住心三寶空是名三歸處

善法堂贊

張燕公集

卷八

七

至哉初上人建立善法堂彩翠三世佛莊嚴清淨眼能運無礙心普入於一切見若不染色知若不取色是名真寔見亦名解脫知佛觀離生滅諸法等如是

益州太清觀精思院天尊贊

并序

蜀山劉尊師上清品人也兄學儒弟奉佛迺畫三聖同在此堂煥乎有意哉達觀之一致也張說聞其風而樂之作天尊贊

正氣生神結氣爲實上清尊帝中黃首出華彩衣裳虛無宮室紫氣乘斗赤鑪鍛日十天從化萬靈受律蓮花

釋門麟角儒術法其不二心同得一道心惟微守而勿

失

銘

并州勅造座右銘

安萬國禮百神放鄭聲遠佞人

進筆硯架銘

筆硯之間聖心必察青蠅孳赦震言漏洩

煖硯銘

筆鋒曉凍墨池夜結香炭潛然推寒致熱

張燕公集

卷八

八

素盤孟銘

并序

國子祭酒韋公好遊山水器珍雅素因適湯泉見榎梓
枌榆良材滿谷乃命山工作爲盤孟益罍樽解呈其文
理素而不飾還都分遺好事者說受賴盤孟三事以銘
之云爾

幽山之木無心世路器爲盤孟制以法度匪丹匪漆惟
眞惟素理真防毀節全思固多用必傷處盈招惡嗟嗟
君子鑒微在悟寔是天然貽我朋故

石橋銘

玉梁架迴碧沼涵空石鞭海上鎖鍛河中橫漢飛鵲規
天拖虹仙聖來往風雲路通

箴

溫泉箴

東山少蓮曰立冥氏之子曰壬夫安祝融氏之女曰丁
芋俱學水仙是爲溫泉之神焉帝命之救萬靈盪滯結
腑臟達膚腠泄下人多賴之上帝是崇杆飛廉氏之佚
女姬之常欲大恩其功故入溫泉必齋肅洗心戒以防
患恕以利物含生之疾我願除妖二神嘉之吹湯激邪

張燕公集

卷八

九

珠連漚累滂泊揚華此其効也若入溫泉僻心穢行惡
言淫形居食失節動出躁輕之神醜之不匡人命飛廉
佚女以裾斃人是生疰苦風瘍眩齟之病夫有意之醫
照合神理無恒之醫身爲慾使莫之益傷之者至矣是
以君子慎其微也

贈別楊益川炯箴

杳杳深谷森森喬木天與之才或鮮其祿君服六藝道
德爲尊君居百里風化之源才勿驕恣政勿煩苛明神
是福而小人無寃畏其不畏存其不存作誥茲酒成敗

之根勒銘其口禍福之門雖有韶夏勿棄擊轅豈無車馬敢贈一言

獄箴

官有決曹掌茲法獄匪惟議罪亦以防欲所貴仁恕非矜窘束吏苟吹毛人安措足古之爲主是戒是勗茫茫率土蠢蠢羣生賢愚中雜真僞相傾若魚之駭如鳥之驚不能無犯宜持以平或大或小時重時輕無以快志期乎得情孰曰非重國之政令孰曰非輕人之性命虐則招咎寬則納慶宜慎宜恤可畏可敬爲獄則固爲牢

張燕公集

卷八

十一

則幽晨嚴管鑰夜密更籌寂寂圜土纍纍繫囚求食搖尾見吏垂頭自昔立名此爲非所逼隘狹室欲傾漏宇冬有祁寒夏多隆暑焉可失入焉可妄處勿謂無妨勿謂無傷匹婦含怨三年九陽匹夫結憤六月飛霜可以安危可以興亡敢告司憲無輕國章

記

東山記

兵部尚書同中書門下三品修文館大學士韋公體含真靜思協幽曠雖翊亮廊廟而緬懷林藪東山之曲有

別業焉嵐氣入野榛烟出俗石潭竹岸松齋藥碗虹泉
電射雲木虛吟惚恍疑夢間關忘術茲所謂丘壑夔龍
衣冠巢許幸溫泉之歲也皇上聞而賞之廼命掌舍設
帟金吾勸次太官載酒奉常抱樂停輿替於青靄佇聳
綸於紫雲百神朝乎谷口千官飲乎池上緹騎環山朱
旆燿野縱觀空巷途歌傳壑是日卽席拜公逍遙公名
其居曰清虛原幽棲谷景移樂極天子賦詩王后帝女
宮嬪邦媛歌焉和焉以寵德也加以中宮敦序謂我諸
兄引內子於重幄見兒童於行殿家人之禮優棠棣之
詩作於是寔其篋篋下以昭忠信之獻賁其束帛上以
示慈惠之恩朝野歡并君臣義洽夫飛翠華歷茨道至
道之主也紆紫綬期赤松素履之輔也千載一時難乎
此遇故兩曜合舍衆星聚德雅道光華高風允塞寒谷
煦景窮崖潤色猗歟盛事振古未有象之元石貽代厥

張燕公集

卷八

七

後金吾階大木官建醮奉常與樂和也
入殿樂備等嵐氣之流也皇上聞而賞之
緹騎環山朱旆燿野縱觀空巷途歌傳壑
景移樂極天子賦詩王后帝女宮嬪邦媛
歌焉和焉以寵德也加以中宮敦序謂我
諸兄引內子於重幄見兒童於行殿家人
之禮優棠棣之詩作於是寔其篋篋下以
昭忠信之獻賁其束帛上以示威惠之恩
朝野歡并君臣義洽夫飛翠華歷茨道至
道之主也紆紫綬期赤松素履之輔也千
載一時難乎此遇故兩曜合舍衆星聚德
雅道光華高風允塞寒谷煦景窮崖潤色
猗歟盛事振古未有象之元石貽代厥

臣劉鳳誥恭校

張燕公集卷九

唐

張

說

撰

表

請許王公百官封太山表

臣說等言臣聞聖人者與天地合德故珍符休命不可得而辭鴻名盛典不可得而讓陛下功格上天澤流厚載三五之盛莫能比崇登封告成理協幽贊故符瑞必臻天意也書軌大同人事也菽粟屢登和平也刑罰不用至理也今陛下稽天意以固辭違人事以久讓是和平而不崇昭報至理而闕薦祖宗億兆之情猶知不可況上帝臨照祖宗顧諟其可止乎願納王公卿士列岳縉紳之衆望迴命有司速定大典臣等不勝懇禱敢昧死再拜上言

請八月五日爲千秋節表

臣聞聖人出則日月記其初王澤深則風俗傳其後故少昊著流虹之感商湯本元鳥之命孟夏有佛生之供仲春修道祖之籙追始尋源其義一也伏惟開元神武皇帝陛下二氣含神九龍浴聖清明總於玉靈爽朗冠

張燕公集

卷九

一

於金天月維仲秋日在端五恒星不見之夜祥光照室
之朝羣臣相賀誕聖之辰也焉可不以爲嘉節乎比夫
曲水禊亭重陽射圃五日綵繩七夕粉筵豈可同年而
語也臣不勝大願以八月五日爲千秋節著之甲令布
於四方羣臣以是日獻甘露醇酎上萬歲壽酒王公戚
里進金鏡綬帶士庶以結絲承露囊更相遺問村社作
壽酒宴樂名賽白帝報田神上明元天光啓大聖下彰
王化垂裕無窮異域占風同見美俗

請置屯田表

張燕公集

卷九

二

臣說言臣聞求人安者莫過於足食求國富者莫先於
疾耕臣再任河北備知川澤竊見漳水可以灌巨野淇
水可以溉湯陰若開屯田不減萬頃化萑葦爲秬稻變
斥鹵爲膏腴用力非多爲利甚溥諺云歲在申酉乞漿
得酒來歲甫爾春事方興願陛下不失天時急趨地利
上可以豐國下可以廩邊河漕通流易於轉運此百代
之利也當今國儲未贍邊軍未息勤人農業願留聖意
亦嘗賜前階之食承後騎之顧竟唯唯而無一言者豈
敢隱情於聖主也正以職在仗衛憂於部伍馬上非公

議之所囿遊非朝廷之事今昧死上愚見乞與大臣籌
謀速下河北度支及溝渠使檢料施功不後農節謹附
賀正使隨軍前曹州考城縣尉同希再奉表以聞謹言
禮儀使賀五陵祥瑞表

右臣等伏以陛下孝通天地親朝五陵拜橋陵則紫氣
見獲白兔甘露降白鵠天光清和日色明朗拜定陵則
有景雲見甘露降拜獻陵則甘露被樹祥雲抱日拜昭
陵則先聖見神遊薦享之際陛下親聞刻息初進服用
樂器自然發聲又素像回面甘露降滋從祀先臣歷聞

張燕公集

卷九

三

蹈舞拜乾陵則有靈草生甘露降日抱戴之瑞此皆陛
下虔誠上感神靈福降四海同懽萬方忭躍臣等幸陪
大禮親視禎祥無任大慶之至謹奉表陳賀以聞臣說
謹言

集賢院賀太陽不虧表

太史奏太陽不虧聖德上感變災爲瑞陽光增輝陰慝
不作休徵之美莫盛於斯臣等無任欣忭之至謹進狀
陳賀以聞謹進

賀大衍歷表

臣說言伏以開元大衍曆天旨裁其紀綱日官考其精
要履端更始敬授維新加以辨五行之序推七精之數
明徵聖期寔光上德臣又見梁天監中陶宏景著玉匱
記云盛德木子以肇來運頃者僧一行推璿衡歷得皇
家天命成數千年古今祥兆若合符契歷數旣在於聖
躬卜年又表於長歷莫大之慶獨冠前王臣忝跡儒林
預聞昌運無任抃躍之至謹奉表陳賀以聞

賀示曆書表

臣說等言內侍尹鳳祥至奉宣聖旨內出新撰曆書二

張燕公集

卷九

四

十五卷以示臣等竊窺深奧仰觀英華涉海登山罔知
攸際臣聞唐堯光宅順昊天而定四時虞舜登庸在璿
衡而齊七政伏惟開元聖神皇帝陛下至德廣運文明
濬哲道冠生知與神合契備往聖之能事紹昔王之盛
典發揮易象以應乘乾之時考正曆書更表履端之始
上包二帝下括三王徵晷運之盈虛究推步之疎密備
稽氣象載躔坎離三辰順軌而更明五緯合度而增煥
是使天地貞觀神人允諧唐虞舊章於斯重覩臣等幸
陪書府得預朝門抃躍之情實萬恒品奉表陳賀以聞

賀祈雨感應表

臣說言臣聞水旱常數堯湯固有聖賢之理恭潔爲難
自冬踰春積陽成亢陛下以時災繫政人忠由君退巫
女之雩却應龍之請陛下躬自暴露炎景瞻仰雲漢推
心引譴爲人受咎誠旣發而動天言冠期而降雨今已
霖霖三日澤漏重泉草樹含欣郊原變色加以雲平雨
細氣潤風和豈惟優渥王畿必將周遍天下羣心舒釋
聖情開暢無任萬姓歡悅之至謹奉表陳賀以聞

讓兵部尚書平章事表

張燕公集

卷九

五

臣說言伏奉九月十九日制書到并州授臣兵部尚書
同中書門下三品王人在門驛騎臨路奉恩循分以慙
以惕臣說中謝臣早以書生射策載筆聖朝晚以軍誌典
兵秉旄乘塞祿非授進寵是宸衷久侍玉階四掌綸誥
一心好直三黜其宜今復用之猶夫入也何足以舉明
邦政光緝帝猷更策疲驂來塵法駕又臣已受命司籍
專意簡書所希散冗因閒就業忽叨劇職責大憂深人
心有限事難兩濟國史無成臣執其罪上思薦賢以自
代下願守分以全節竊見開府宋璟清介獨立倚法而

不回詹事陸象先清明向道臨事能斷其高明有素歷朝之所仗委其積行無疵象人之所嚮信揆停住任未盡宿誠乞迴此恩以納來効必能補舊政之缺漏廣前途之軌轍雖深心力臣頗與二子齊驅然校德考年彼皆有一日之長天下者累聖之公器宰相者萬方之具瞻臣所以廷讓彰言不陳密啓伏願聖恩聽輿論而舉衆聖所矚倘朝任得人實海內幸甚無任力微任重惶懼之至謹奉表陳讓

讓封燕國公表

張燕公集

卷九

六

臣說言伏奉今月七日制書封臣燕國公食封三百戶寵靈猥及中心如快臣說中臣聞至道之時重法守義上無無功之賞下無無德之祿故授受禮全而踰越不起伏惟陛下光撫宇內大寧天域百度維新萬靈翹注建侯疏壤允答元功臣亦何人首膺是命自古有道而爵說經而封蓋以訓蒙成聖資師通學臣之侍講有異前聞何者大明朝昇螢燭無助時雨文濡浸灌焉施幸得依附光景游泳渥澤豈敢虛承啓發之恩謬荷將就之報且如人臣之義二則爲罪一心不回愚知之分譬

如犬馬有不背之性草木有不彫之理知何德於天壤而欲蒙造化之偏施哉臣之無功正與此類叨恩過量終懼且慙乞迴聖慈以容介節無任惶悚之至謹詣朝堂奉表陳讓以聞

讓中書侍郎表

臣說言伏奉制書除臣中書侍郎寵命俯臨驚魂自失

臣說中謝臣聞雲構鬱起非枳棘之任天波暴集寧溝澮

所容臣識無通方文不經國南宮華省已忝前行西垣

內閣將陪近侍心慙官謗跡愧時流何以承掌主言贊

張燕公集

卷九

七

決機務當今二儀再造百度皆新太平之基惟賢是與混成庶政責在中書豈以常才敢膺首選乞寢恩命改擇時髦惟慎庶官以諧僉議無任悃款之至謹詣朝堂奉表陳讓以聞臣所讓人別狀封進

讓右丞相表

臣說言伏奉制書除臣右丞相兼中書令臣學慙稽古早侍春官階緣舊恩忝竊樞近雖思致君堯舜而才謝伊臯屬升中大封方求俊乂猥升端右實愧朝行乞停新令獲守舊職辭納情懇希垂察諒無任屏營之至謹

奉表陳讓以聞

第二表

臣說言伏奉今月十日制書除臣尚書右丞相恩命自

天戰跼無地臣說

謝中

臣少長儒門墜鑿墳史才非高格

官不因人徒以命偶龍興位階鴻漸五入西掖七踐南

宮中間拙延謫放直招玷缺傷矢之禽聞竝虛墜賜環

之容聽歌先泣此則魂爲危感氣由懼奪安可重收廢

器再辱端揆何以師長禮闈正持憲府當今典章革故

風教鼎新野無四隱朝有三傑具瞻之地願擇時髦臣

張燕公集

卷九

八

幸沐遺簪墮履之恩好生養志之德朝遊簡牘幕對圖

書受賜無涯循榮過分豈更于處士之橫議招匈奴之

遙哂艾骨自瘡負乘致寇雖則愚情懷戀覩冒求寵亦

望聖慈限約令度餘年願停今授長守舊史罄陳肝膽

非敢飾讓謹詣朝堂奉表自乞臣說誠惶誠恐頓首頓

首死罪死罪謹言

讓中書令表

臣說言伏奉今月十一日制授臣中書令恩渥自天震

越無地臣說

謝中

伏惟陛下至孝安親大功定國六合翹

首庶政惟新雍熙之化望在茲日中書理本臣叨首名
將何以翊贊聖君光澤天下自臣攝官禁掖已涉七旬
不知賢才以舉是不仁也不辯不肖以退是無勇也何
足以備乎宰臣胡顏冒恩復受真拜臣之愚執正在於
此不敢繁詞以塵聖聽乞迴榮授改擇時髦無任懇款
之至謹詣朝堂奉表陳讓以聞臣所讓人別狀封進

讓平章事表

臣說言臣伏奉宣旨制書以臣同中書門下平章事承
命戰汗拜舞失容臣說誠惶誠恐頓首頓首死罪死罪

張燕公集

卷九

九一

臣本書生器識凡近住不望於通貴祿只宜於代耕蒙
時寵榮越踐臺閣局心守職竊所庶幾長算經邦則無
逮及伏以廟堂寄切軍國務殷循涯審分非臣攸處爲
國者爲官擇人爲臣者陳力就列若志小謀大力微任
重豈敢顧惜微軀實恐上塵王政是以披露肝膽不暇
飾詞乞停此授俯遂誠情無任怖懼慙惶之至謹詣朝
堂奉表陳讓以聞

讓起復除黃門侍郎表

草土臣說言臣私門凶咎喪紀未終不自毀滅苟存聖

代忽降制書復臣工部侍郎尋奉後命授臣黃門侍郎
震駭失圖哀怖殞絕臣說誠惶誠恐頓首頓首死罪死
罪臣弱年早孤母氏訓立得紹其構忝列簪裾從官歷
年晨昏多闕播遷遠裔離別又苦顧復無答報養何追
心所摧感語不能喻甫至冬中禮及祥禫今已春暮瞻
言幾何是臣事朝廷日長戀几筵日短乞寢嚴命許達
私情訴衷祈天所望矜遂無任荒迫之至謹朝詣堂路
左奉表乞哀以聞謹言

第二表

張燕公集

卷九

十

草土臣說言臣在疚承榮布哀陳欵精誠無感天睠未
廻假喘殘生悲懼轉集臣說誠悼誠恐頓首頓首死罪
死罪臣聞苦者不覺聲哀窮者貴其言達情有至切辭
無敢隱臣爲少子慈愛所鍾每一離別輒加憂憫况臣
生年多故違隔私庭終堂之日身限公事存旣數違左
右沒復不畢几筵痛心自傷特殊人類臣今望延數月
企及再期乞恩無多報國非晚冒死重請冀蒙哀遂無
任懇迫之至謹詣朝堂路左奉表陳乞以聞

第三表

草土臣說言臣荒喘窮情再竇旒屐懇誠不到未感天
心誓將冒死祈恩分外謝臣本書生門非代祿數葉單
緒族無親房臣父遭憂曾祖未葬臣有兩兄一妹甥姪
九人又有中表相依尚成百口吉凶衣食待臣以辦臣
今拜職黃閣侍奉丹墀厚祿清班一朝改官舉宗榮賴
爲幸過甚人情所欲豈合稽恩正以煢煢苦心有所未
盡臣亡母在日朝夕誠臣以臣獨立無徒好直多忤知
子者母果驗所言往懼大獄竄命炎海晨出晚歸貽慮
非一况涉危難傷心幾途追計生平倍增摧慕侍養日

張燕公集

卷九

七

少違離日多即臣母憂臣以終身臣其忍服縗以從事
情旣不同常例望在特降殊恩臣先患風緩近加虛痺
陛下倘從臣數月容過再期非但寬其哀疚固亦全其
生理亡身報國庶竭後圖木植有性枉之則折人願在
心違之則苦雖強爲用將何以堪銜泣仰天冀蒙哀允
無任懇迫之至謹詣朝堂路左奉表陳乞以聞

謝觀唐昌公主花燭表

臣說言內侍尹鳳祥宣勅賜臣觀唐昌公主花燭伏以
天人下嫁王宰送行苟非榮寵何階瞻望臣免歸餘叟

忽承朝請之恩廢駕羸驂復覩肅雝之禮鴻私所被枯
瘁生光無任歡荷之至謹奉表陳謝以聞

諫內宴至夜表

臣聞上天示下災祥將以誘導人主先王仰觀休咎亦
以順修政教易曰天垂象聖人則之言天人之際感通
必矣臣伏見去年十月十七日月滿猶望應虧不虧今
月十七日亦未少虧此易常之異也夫月者至陰之氣
臣下之家當助天作明順期盈缺若過盛逾時盈縮乖
度得非臣下之咎而上天之誡耶伏願陛下深察熟思
而預防臣又見近日內宴夜深方罷小臣無識抑所未
安王在在鎬凱樂飲酒此誠大雅之美也臣卜其晝未
卜其夜此蓋春秋之義也伏願陛下宴樂之餘不及於
夜臣職忝補闕昧死陳愚謹言

進鬪羊表

臣說言臣聞勇士冠鷄武夫戴鶡推情舉類獲此鬪羊
遠生越雋蓄情剛決敵不避強戰不顧死雖為微物志
不可挫伏惟陛下遷良家於六郡求猛士於四方烏無
遁材獸不藏技如蒙効奇靈圍角力天場却鼓怒以作

氣旋躑躅以奮擊跌若奔雲之交觸碎如轉石之相叩
裂骨賭勝濃血爭雄敢毅見而衝冠鷲狼聞而擊節冀
將少助明主市駿骨掛怒蛙之意也若使羊能言必將
曰苦鬪不解立有死者所賴至仁無殘量力取勸焉臣
緣損足未堪履地謹遣男駙馬都尉埴謹詣金闕門陳
進輕冒宸嚴伏深戰越

進佛像表

臣說言去年行塞至朔州忍辱尼寺見有高祖太宗造
金像銀趺刻題尊號彼州士女屢瞻佛光臣懇思聖心

張燕公集

卷九

三

如在咫尺伏以皇帝事業遠存荒塞拯溺救焚身勤慮
苦歸誠佛實何神不據信知功遍區域澤周生人心憑
神靈躬履危險故皇天眷命奄有邦家後嗣聖人欽承
大寶所當思由積德而興帝系本艱難而成王業先聖
一心奉佛者蓋爲百姓求福也陛下爲繼文之主實創
業之功再廓氛祲重安廟社垂統萬億同符祖宗夫惟
興王必藉佐命咸有一德克享天心書曰非天私我有
商惟天佑于一德非商求于下民惟民歸于一德功臣
同德可不念哉物有小而感深事有微而傳遠臣謹將

金像隨表奉進謹言

不送進渾儀表

臣說言臣聞迎日授時莫先於歷象先天成務必歸於制作伏惟開元神武皇帝陛下建中立極緯武經文至德難名神功莫測於是定歷成歲立象考天紹唐堯欽若之文繼虞舜在璿之義上皇能事於斯備矣臣書院先奉勅造游儀以測七曜盈縮去年六月造畢進奏又奉恩旨史立渾儀臣等准勅令左衛率府長史梁令瓚檢校創造於是博考傳記舊有張衡陸績王蕃錢樂之等並造斯器雖渾體有象而不能運行事非經久旋即毀廢臣今按據典故鑄銅爲儀圓以象天使得俯察上具列宿赤道周天度數注水激輪令其自運一日一夜天轉一周又別立二周輪絡于天外綴以日月令得運行每天轉一匝日行一度月行十三度十九分度之七凡二十九轉有餘而日月會三百六十五轉而行匝仍置水櫃以爲地平令儀半在地上半在地下晦朔弦望不差毫髮又立二木入於地平之上前置鐘鼓以候辰刻每一刻則自然擊鼓每一辰則自然撞鐘皆於櫃中

張燕公集

卷九

古

各施輪軸鉤鍵交錯關鎖相持轉運雖同而遲速各異
周而復始循環不息陰陽不能逃其數度分不能隱其
時究天地之回斡極乾坤之變化斯皆上稟聖謨旁獲
神助臣等愚思非所能及望錄付史館宣示百寮使知
告成之功迴越前古無任勤懇之至謹隨表奉進以聞
臣說誠惶誠懼

臣出幽州論戎事表

臣說言伏以先帝以臣踐履忠孝使臣啓發聖明故得
侍讀春闈夙承天眷洎於中歲兼掌樞密內當沸騰之

張燕公集

卷九

五

口外禦傾奪之勢陛下監撫旣安自天所佑然臣叶贊
之意神明啓之開元之始首典鈞軸智小任大福過災
生出守三州遠離六載曲直非已升降由人惟君知臣
事不待說今旣牧邊鎮委重戎麾竊以兩蕃共和能識
同異九姓遠聞撫納欲恃賊殺無侵擾之慮保兩蕃受
徵發之期臣愚料之恐未然矣何者賊殺新立必逞兵
所加必收九期若去兩蕃搖失九姓雖屬并州節度然
其幽州密邇脫有風塵何所不至臣熟聞幽州兵馬寡
弱卒欲排比未可卽用城中倉糧全無貯積事未逼迫

臣寔憂之伏乞聖慈深以垂意博詢舊將豫爲籌畫事
若早圖必無後悔且孤臣總衆易起猜嫌寬大失濟事
之宜嚴整招怨黷之謗遠辭天聽臨事回惶如有論告
臣身奏劾軍事者乞追臣面問對定實虛則日月無可
蔽之期幽遠有自通之望伏乞畱書在內時加矜察

張燕公集

卷九

六

臣劉鳳誥恭校

張燕公集卷十 張燕公集卷十

唐書

說

撰

表

并州論邊事表

臣說言臣說頓首死罪死罪言臣聞小忿不忍起大患小罪不寬迫成大禍契丹奚背恩誠負天地不容之責然原其狀本是兩蕃君臣不自相誅戮耳伏望聖慈且使其族類在朝者將勅書再三告讓因其所欲立酋長而更定之或不戰而定也必告之不訓則大發

張燕公集

卷十

一

兵馬東召靺鞨西舉九姓來春未青數道齊入單于之首可拾而取未為晚也天恩若不忍以中國勞事蠻夷則嚴兵備塞棄兩蕃如糞土耳又許欽淡擁二萬餘兵據五丈之城有糧卽守不可拔無糧卽鼓而行何所慮也今遣使獻非時遠抄近掠其實甚難萬一未捷賊氣轉壯下情愚昧不敢隱情伏望聖恩再加裁度臣說誠悼誠恐頓首頓首

百官請不從靈駕表

臣某等言伏以靈駕首途聖思攀從國計非便羣情不

安冒昧上祈未蒙哀允跪拜還旨載深惶惕臣某等誠
惶誠恐頓首頓首死罪臣聞古者天子上法天心下極
私情不違衆欲以順人理國爲孝以克己制心爲禮是
故凡聖異禮公私殊制私心獨展凡人之孝萬姓感善
聖人之孝也陛下行堯舜之事以萬姓爲心奈何守曾
閔之節懷獨展之願臣等嚮竊所未曉且永淳以後
關輔流散近適旋定人猶未足今山陵起築役徒摠萃
彌春涉夏爲費宏多若陛下此行羣司畢從於人取給
臣實難之水旱小愆農慮非淺東都則水漕淮海易資

監穀之蓄陸走幽并近壓戎夷之便朝命新復人望在
安宜應靜鎮未可移動陛下若俯順羣願留撫都人則
其安若此如不勝私情攀奉靈駕則其慮如彼况扈從
兵馬旣不預集行官廩蓄又未先備發期甫爾支計闕
然倉卒敦迫必不堪辦若待陵寢旣安霜露終感三農
歲稔萬乘時巡奉園廟以展虔瞻日月以何遠今固將
抒私戀棄羣言忘人力費國用此實非陛下安集新業
之圖亦恐非先后憐憫遺人之意且朝廷故事典章猶
在獻陵追遠太宗不至于三原昭陵上遷高宗不至于

九變豈先帝私懷不堪故事羣臣公議之所奪也伏願
仰遵舊訓顧定新基屈至性而順羣情抑小節而成大
孝使軍國長算咸洛皆安那甸窮人賦斂少減萬姓翹
望寔深至願百寮結誠期於死請無任悲迫之至謹詣
朝堂奉表固請以聞

為留守癸慶山醴泉表

臣某言臣聞至德洞微天鑒不遠休徵祕景時和則見
是知縣代曠歷慶牒祥經帝王有必感之符神靈無虛
應之瑞伏惟天冊金輪聖神皇帝陛下金鏡御天璿衡

張燕公集

卷十

三

考政欽若元象宏濟蒼氓茂功將大造混成純化與陽
和俱扇朝百神之樂職宅萬國之懼心嘉氣內充淫雨
外息豈止搖風紀月之草列時於階除儀簫銜籥之禽
相鳴於戶闕而已固有發禎厚卦抽貺泉源表元德之
潛通顯黃臚之昭報臣於六月二十五日得所部萬年
縣令鄆國忠狀云六月十四日縣界霸陵鄉有慶山見
醴泉出臣謹差戶曹叅軍孫履直對山中百姓檢問得
狀其山平地湧拔周迴數里列置三峯齊高百仞山見
之日天晴無雲異風雲之遷徙非崖岸之騫震歛爾隆

崇巍然翳鬱阡陌如舊草樹不移驗益地之祥圖知太
乙之靈化山南又有醴泉三道引注三池分流接潤連
山對浦各深丈餘廣數百步味色甘潔特異常泉比仙
漿于軒后均愈疾于漢代臣謹按孫氏瑞應圖曰慶山
者德茂則生臣又按白虎通曰醴泉者義泉也可以養
老嘗出於京師禮斗威儀曰人君乘土而王其政太平
則醴泉湧潛潭巴曰君臣和德道度協中則醴泉出臣
以五行推之六月土王神在未母之象也土爲宮君之
義也水爲智土爲仁水伏于土臣之道也水相于金子

張燕公集

卷十

四

之佐也今土以月王而高水從土制而靜天意若曰母
王君尊良臣善相仁化致理德茂時平之應也臣又以
山爲國鎮水實利人縣有萬年之名山得三仙之類此
蓋金輿景福寶祚昌圖邦固不移之基召永無疆之壽
自永昌之後迄于茲辰地寶屢昇神山再聳未若重巖
結慶並泌疏甘羣瑞局區三美齊舉高視古今曾無擬
議信可以紀元立號薦廟登郊彰寶德齡愉衍萬宇臣
辱司京尹忝寄留臺牧西夏之疲人荷東藩之餘寵游
泳鴻沛神禧嘉祉物感有歸光啓茲部喜觀殊觀賀百

恒流踴躍一隅馳誠雙闕伏請宣付史館頒示朝廷無任臆藻之至謹遣某官進圖奉進

爲畱守奏瑞禾杏表

臣聞天微地杳惟聖能通物寶靈禧在德斯感伏惟天冊金輪聖神皇帝陛下覆翼萬方植生羣類化行至道風流太和白耀青光日月之瑞赤文元甲手河洛之符旣慶溢于山泉又嘉賁於草木臣今月三日得所部萬年縣令鄭國忠狀言縣界內霸陵鄉新出慶山南出醴泉北岸有瑞杏三樹再葉重花嘉禾三本同莖合穗

張燕公集

卷十

五

臣謹差司兵叅軍鄭味元檢覆皆實臣謹按孫柔之瑞應圖曰嘉禾者五穀之長也王者德茂則生昔炎帝教洽人心而嘉禾秀周公理合天道而嘉禾豐臣又以事可理推物有類驗蜀桑異葉李定知其有祥漢水奇枝終軍以爲無外今植物搖落而瑞杏繁滋所謂仁育之風行於肅殺之序此蓋聖道隆渥靈祚和多朱萼素花彰孝理於詩傳一莖九穎合德耀于祥經曠代殊珍崇朝累集方俟山流石髓杏茂仙林醴挹軒漿禾登堯膳受天介福錫帝長齡覲王母於崑臺朝神人於谷口今

綠苗尚蕘黃粒未成當須晚秋不獲早獻臣忝尹茲部
頻矚洪休抃躍之誠倍萬常品固亦未敢而博正
為畱守作賀峒山表
臣聞山川變見如來有得道之祥國土遠移至人任不
思之力伏惟皇帝陛下宏惠禱深勤人願滿蓮花授記
應上聖之降生貝葉開圖握大雄之寶命司戶參軍孫
履直伏承臣奏所部萬年縣新出慶山醴泉乃有天竺
真僧於春首獻狀若以梵音所記此是祇闍山恒河沙
佛必經林下虛空衆聖堂處巖間隱見外方湧秀中土

張燕公集

卷十

六

岑泉可識體類宛然感應十號之尊示見千輪之主此
實天威無礙地寶有歸化焜耀於裁成理窈冥於言說
但瞻三山丹壁奄靈鷲而飛來三泉潑池逐神龍而吐
沃峯高八百協周室之隆基地得萬年神皇靈之資始
儒書分載望偈希聞加以堅固開林吉祥被草重花瑞
杏藻岫紅源九穎嘉禾葱鬱黛壑原臨白鹿識鹿苑之
仙遊路邈朱城悟玉城之鍾聽方俛迴輿雪嶺厭香積
於羣臣沈璧天池蔭靈枝于下國吹法螺而朝玉帛乘
瑞象而會天人濫宇流觀殊隣浹慶臣守符京郡奉神

嶽於郊畿係葉皇柯仰慈雲于油露喜抃之極倍百恒
誠

爲畱守奏羊乳麀表

臣聞靈感無方每先時以見象神靈不昧必憑物以示
人有德著而休歸或祥來而事應伏惟天冊金輪聖神
皇帝陛下端冕馭天舞干柔遠南越瑞貢久通譯而歸
仁西域奇山近隨方而應聖臣今月得所部萬年縣令
鄭國忠狀送新出慶山下殺牝羊乳麀麀一頭狎擾因
依動息隨戀如從所產若素同羣理有可嘉事無前例

張燕公集

卷十

七

竊以異類相育外方慕化之徵野畜自馴荒服來王之
兆必有遠夷企踵歡心百獸之庭獮俗懷音稽顙三乘
之會臣言可驗翹足是期昔馬或生羊易占得人安之
體犬時養鏡天鏡顯代康之文援此比蹤實爲同貫况
復晨飲醴浦夕下靈山翳仙杏之奇花拾嘉禾之餘穗
羊祜甚玉輦慶如銀晦朔未移祥符累集福應之盛前
古未聞臣忝尹京都屢薦嘉瑞抃躍之至兼倍恒流謹
差某官奉表隨進

爲畱守奏嘉禾表

臣某言臣聞天聽自人神和在德代非乏瑞罕遇交泰
之期福不虛徵必自休明之主伏惟天冊金輪聖神皇
帝陛下仁覆萬靈孝理四海功罔高於尊祖道莫大于
配天嚴備郊禋崇肅宗祀秩百王之禮兼六代之樂化
溢膠庠訓優更老政每光于帝籍役不奪于農時嘉氣
橫浮祥風紛洒騰文煒色九光連合于貞明逸輦殊輪
百寶駢滋於動植臣今月日奉進止告望鳳臺山泉之
喘其日于東山栢城內得嘉禾一本臣初見衆苗巨隴
香穎垂秋嘉翫繁滋欲觀稔粒左右無識折以呈臣異
其綠葉緩舒蔥芒璧秀熟視奇狀乃知嘉祥下則異畝
合莖上又同延雙穗昔雍熙之代理政之君雖導出應
時而生不擇地未有託根神域彰孝德之能深吐秀壽
宮助榮盛之豐潔此蓋睿誠通感天佑降祥申占以來
未覩斯美臣籍慶宗枝久沐星潢之潤躬持瑞穎預奉
天保之符忭悅之誠倍兼恒昝

爲清邊道大總管建安王泰失利表

臣攸直言今日某往峽石山稱前軍王孝傑等以某日
失利於峽石山忽聞殞絕心摧魄死上孤天威下慙士

卒死罪死罪頓首頓首臣以驚怯謬職戎麾銜戴恩榮
統率將士驅關隴之馬引淮海之餉旗幕亘於邊城弓
甲傾於內府不堪任使撓失節度羣帥無決勝之功偏
師有挫衄之咎憤結靈祇怨毒骨髓臣實其罪罪非他
人忍恥苟全遠愧胡顏之責引慝遘死內負猶闕之心
跼蹐無顏進退靡處臣既不建師律有干常憲合卽嚴
科以塞重責然以見在兵馬交要部統未敢束手軍事
委置旌節稽緩刑書伏深兢戰特乞更召嚴猛代臣統
帥請歸罪司寇以正國刑囚伏邊陲唯待斧鉞

張燕公集

卷十

九

爲建安王謝賜衣及藥表

臣某言伏奉月日恩賜臣衣及藥渥流璿極彩溢旌門
拜捧戴舞載欣載越臣受律虧方扞城無寄偏師不振
逋寇仍滋進慙計日之功退任踰時之咎誠合歸罪司
寇以厭深責豈圖天寵猥臨宸慈寬假當從褫服轉承
且吉之衣宜肆典刑翻加有喜之藥毀車夷馬復振鸞
和竈炭枯莖重敷榮燭暘影邊塞馳心闕城微命易投
生成難謝無任感戴

爲建安王讓羽林衛大將軍兼檢校司賓卿表

臣某言伏承月日刺書除臣右羽林衛大將軍兼檢校
司賓卿朝榮封及恩露洪垂罄仰驚扑環揆慙失臣某
頓首頓首臣席慶皇枝辱司天衛素官成責久盈人口
頤屬山戎自擅土師震加謬當推轂之禮竟空汗馬之
績實賴睿謨幽贊靈兵潛討靖烽塵於遼海卷旄麾於
燕薊臣得歸功北闕待罪東藩沐休旼生死榮幸安
敢賣要塞而告勞貪天功以爲己又况羽林清禁上則
星辰主客命卿下法河海蓋文武具美方議均僉歸豈
臣弊劣所堪尸忝伏乞特迴瞻鑒更擇能賢俾朝鼎新
之至謹詣朝堂奉表陳讓以聞

爲薛稷讓官表

臣稷言伏奉制書除臣工部尚書寵靈俯逮營魄震飛
揣分何階戴恩無力臣某中謝臣才乏濟川功微橫草故
以業承薪構澤潤葭莩効雕蟲之薄技蒙命燠之榮飾
徒參進對愧無好詞頃以冗職東垣暫諧清曠今若統
司南省將招素餐五翟之正典事斯重六官之長求人
未易以臣叨受竄謂非宜願寢前恩致命他士無任悚

懼之至謹詣朝堂奉表陳讓以聞臣所讓入別狀封進

爲郭振讓官表

臣某言臣本書生幸事先帝歷踐清職遂參機密宗武
樹黨忿嫉正人猜忌眉睫構結瘡痍臣與一二貞士排
天誓心枝梧羣邪捍城王室曉入宮省暮不望歸艱危
備嘗幾不免禍日覲一日以逢開泰臣之宿圖今已足
矣陛下寶位旣復元良又定凶讎咸剪百度惟新正宜
博採屠釣大變風俗豈臣微才空忝重任外不厭於衆
望內實猥於多言但父年老先嬰風疾五月已來不離

張燕公集

卷十

十一

枕席臣方寸已亂短效無施夙夜在公扶持有關乞免
官秩歸侍私庭罄心仰恩期於孝治無任懇迫之至

謝修史表

臣某言伏奉今月十六日勅令臣在家修史捧恩戴命
且喜且慚臣服道儒門策名昌運掌綸四后載筆三朝
階緣宿遇登躡端揆職爲劇於心盡史無用而功廢自
貽官謗待罪私門反魯之感徒深藏周之望已絕豈意
特流天旨重緝簡書雖才慚左丘而時盛周漢况復編
堯舜之年事皆目覩叙羲黃之德音匪傳聞善志將訓

于百玉寔錄可貽於千古國家之鴻業辦矣朽臣之至願畢矣不勝天恩難任之至謹奉表附內侍尹鳳祥陳謝以聞

謝賜碑額表

臣說言伏奉今日恩旨賜先臣碑額悲荷交心拜捧以泣臣某謝中臣亡父先臣隲安貞下位不待昌辰先帝贈之以崇城陛下目之以積善光賁重渥感慶三泉舉宗悲喜外姻歡賀昔孔象吳札之墳秦存展季之壟事輕列國義小陪臣豈若天王禮士鳳書旌墓榮軼曩賢道映來籍在臣在子移孝爲忠心効草木何酬雨露無任幽明感戴之至謹奉表陳謝以聞

謝京城東亭子宴送表

臣某言力士至奉宣勅以臣臨岐特令賜宴恭承惠渥念及庸微天地同仁木石知感不勝惶悚戴荷之極臣某謝中臣歷觀自古君臣凡所際會或因緣黨進或延接功成故未竭而知不言而信豈有地孤援寡費衆謗深察蒙蔽之中致曠蕩之外逢陛下特達之遇當陛下聖明之朝事出非常澤深恩重今者誓將瀝血未足竭誠

徒欲殺身豈能報德至如勵精勤政與直守公酌陛下
憂人之心行陛下宏道之化安敢失墜以負神明但函
關路遙長安日遠不任戀主懷陰之至

謝賜鍾馗及歷日表

臣某言中使至奉宣聖旨賜畫鍾馗一及新歷日一軸
者猥降王人俯臨私室榮鍾睿澤寵被恩輝臣某謝
伏以星紀迴天陽和應律萬國仰惟新之慶九霄垂湛
露之恩爰及下臣亦承殊賜屏祛羣厲續神像以無邪
允授人時頒歷日而敬授臣性惟愚懦才與職乖特蒙
張燕公集 卷十 五

聖慈委以信任既負叨榮之責亦懷非據之憂積愧心
顏雖勝惕厲豈謂光迴蓬華念等勲賢慶賜之榮賤微
常及感深犬馬戴重邱山無任感荷之至

荊州謝上表

臣某言伏奉二月二十五日制書除臣荊州大都督府
長史拜命荒服浮舟端泝以今月十七日到州上訖山
列楚望水橫南紀德非羊祜迹謝宋均何以鎮靜流亡
攘除猛暴臣某謝
臣宿濫宸睴累塵榮獎福過生災至
剛多缺及一辭庭闕已涉五年不有自白之書竟無因

人之請天光獨照雲霧頓披窮麟更躍鍛剛仍翦揣分
瞻恩何階及此媿乏才能不足宣暢皇風敢竭心力少
冀上酌元造無任欣忭兢惕之至謹附送丁匠資使所
部文林郎守公安縣主簿封希魯奉表陳謝以聞

謝問表 元宗

臣說言內給事高力士至伏奉聖制聖慈綢繆言及舊
昔拜舞捧讀且驚且喜臣聞漢主眷驂乘之臣魏君憶
同遊之客誠以故舊不棄而光陰易往今之聖情實過
於昔臣曩蒙侍文北閣陪宴東堂庭闕一遙寒暄二載

張燕公集

卷十

高

不意逢春之草承清露之惠渥容光之隙引遲日之暉
華無任荷恩戀主之至謹附高力士奉表陳謝以聞

謝賜藥表

臣某言去年某月日於右銀臺門蒙天恩引對特承慰
問攝理無方以致熱疾緣在假內不敢奏聞聖慈憂軫
詔使臨門伏枕在床雖體氣未適趨風拜命覺腠理遂
平恩榮豈止於邱山朽質永延於龜鶴無任感戴之至
謹奉表陳謝以聞

岳州刺史謝上表

臣說言伏奉四月十有二日制書除臣岳州刺史廿月
二十七日遞書到相州承恩悼怖狼狽上道以月一日
至岳州上訖臣以昔侍金華過蒙榮寵負乘招寇日待
譴黜聖慈遲廻仍委符守刻肌刻骨誠願上報恩私無
術無才將何克宣風化夙夜慙惕胡寧啓處伏以貶官
到任理化速聞不敢循常稽緩附使無任荷恩竊懼之
至謹遞表陳謝以聞

爲僧普潤辭公封表

僧普潤言伏奉甲寅制書以普潤加榮沐秩授臣封公

張燕公集

卷十

五

聖恩無涯將變枯朽佛法有教誠願住持普潤自鞠落
環衣五十餘載心不見是口不言俗因誠證業憑禪悟
理幸逢皇祚特啓大運有歸皇太子逼畏凶讎永懷興
復憂虞之警始蒙顧問貧道起廣救之悲決必成之策
奉符命之旨贊無畏之心今得衆生又安羣魔消伏任
於法侶所願爲多視身本無何功受祿天位有德陛下
享之天討有非太子行之豈貪天之功以爲己力賣佛
之法而求身利必若冒榮背律返俗違真亦恐乖陛下
崇信之誠失如來付屬之義凡所稱述諸佛證明伏惟

聖慈亦垂開領乞停恩授以幸法門無任護戒傳道之
至願謹詣朝堂奉疏陳情以聞

張燕公集

卷十

六



臣

秦恩復恭校

張燕公集卷十一

唐

張

說

撰

疏

諫避暑三陽宮疏

陛下屯萬乘幸離宮暑退涼歸未降還旨愚臣固陋恐非良策請爲陛下陳其不可三陽宮去洛城一百六十里有伊水之隔嶒坂之峻過夏涉秋水潦方積道壞山險不通轉運河廣無梁咫尺千里扈從兵馬日費支給連雨彌旬卽難周濟陛下太倉武庫並在都邑紅粟利

張燕公集

卷十一

一

崇藴若山邱奈何去宗廟之上都安山谷之僻處是猶倒持劍戟示人鑄柄臣竊爲陛下不取夫禍變之生在人所忽故曰安樂必誠無行所悔此不可止之理一也宮城褊小萬方輻湊填城溢郭併鋪無所排斥居人蓬宿草次風雨暴至不知庇托孤惇老病流轉衢巷陛下作人父母將若之何此不可止之理二也池亭竒巧誘掖上心削巒起觀竭流漲海俯貫地脉仰出雲路易山川之氣奪農桑之土延木石運斧斤山谷連聲春夏不輟勸陛下作此者豈正人耶詩云人亦勞止汔可小康

此不可止之理三也御苑東西二十里所出入往來雜人甚多外無墻垣禁籞內有榛叢谿谷猛獸所伏暴隱是憑陛下往往輕行警蹕不肅歷蒙密乘嶮巖卒然有逸獸狂夫驚犯左右豈不殆哉雖萬全無疑然人主之動不宜易也易曰思患豫防願陛下爲萬姓持重此不可止之理四也今國家北有外寇觀邊南有夷獠騷徼關西小旱耕稼是憂安東近平輸漕方始臣願陛下及時旋軫深居上京息人以展農修德以來遠罷不急之役省無用之費澄心澹懷惟億萬年蒼蒼羣生莫不幸

張燕公集

卷十一

二

甚臣自度芻蕘十不一從何者沮盤遊之娛聞林池之玩規遠圖而替近適要後利而棄前歡未沃明主之心已戾貴臣之意然臣血誠密奏而不愛死者不願負陛下言責之職耳輕觸天威伏地待罪

諫潑寒戲疏

臣聞韓宣適魯見周禮而嘆孔子會齊數倡優之罪列國如此况天朝乎今外蕃請和選使朝謁所望接以禮樂示以兵威雖曰戎夷不可輕易焉知無駒支之辯由余之賢哉且潑寒胡未聞典故裸體跣足盛德何觀擇

水投泥失容斯甚法殊魯禮藐比齊優恐非干羽柔遠
之義樽俎折衝之禮

狀

論神兵軍大總管功狀

右牒奉勅責聞大總管功狀者自契丹背恩營州失守
前軍喪律榆關不開幽平烏栖於重壘戎羯虎食於四
野燕南諸城十僅存一河朔之地八挾兩端由是豺狼
入於牢穿蜂蠆出於懷袖受服不宿孤劍先驅寇讐日
深甲兵未繼于時鳩合步騎不滿三千彼衆我寡兵法

張燕公集

卷十

三

虜熾且保關守塞力猶不禦况土人弄兵轉相攻拔外
召夷狄內據險隘冀州旣陷勢將不已當決水之衝承
烈火之焰逆風撲燎摧岸塞河韓白見之知其難矣王
權以料敵靜而鎮下宣國恩以撫寧曉愚俗以逆順督
將吏以忠義示士伍以嚴肅深籌秘于六奇潛檄通于
千里滄瀛貝博響援增氣幽易恒定聲威有立而又分
兵井陘杜其西望引軍河漕阻此上流張虛旗于趙賊
設奇兵于襄國亦猶夫吳人潛軍于巢縣而見舟豫章
漢將捷逕于武關而聲出峭澗蓋廣援以安衆多方以

悞敵故能舉無遺策兵不踰時滌昂宿于妖氛拔冀方
于塗炭俾皇靈溥暢黔首昭蘇朝廷釋東顧之憂漳滏
息南侵之患然後歸剽掠返流亡業窮乏賑痍傷僵暴
皆掩死喪無怨賞不失勞亦無濫受罰不漏罪亦無冤
人則王有大勲于是役也而又誠以奉上義以利人至
忠之狀有三爲善之跡有五所謂忠者一曰思致命也
初戎寇方殷王乘駟救衆纔數騎捍敵羣醜山東父老
如恃山河旣而王躬擐甲胄吐誠師旅誓在盡敵以報
前讎故得感激來戰決命爭勝二曰能果斷也凶黨狂

張燕公集

卷十

四

狡飛轉妖書吹堯謗舜間誘愚惑事斯蔓結搖我人心
王陰察州閭揜求魁蠹獲應賊書人耿羅渚等一十三
人焚書伏罪衆而後定故得破謀殺謀悖計無施三曰
誠感神也王地維近屬躬當大任所過山川鬼神之地
罔不精意懇禱以請云天子聖明皇天輔德寔降靈助
以濟神兵幽感明祇多獲孚祐故得行師之處勝風送
旗合戰之時興雲翊陣金鼓所向水消草靡所謂善者
一曰均下也飲食勞逸與將士必同二曰潔已也徧賞
有功王秋毫無受三曰詢善也國之彛典成誦在心閱

寔定名必資羣議四曰嫉惡也每戮一人親數其罪必
深加咎責使愧恥於地五曰不伐也賊平之日將吏賀
功王稱美天威推勞士衆兢兢然若不已有也惟聖人
神武制命預授兵符惟大總管忠善翼行克成廟算今
者顯號年紀騰輝國籍方謂垂範雲臺勒休彝器而秋
杜遣莫甫率于舊章茅土增封殊末于宗正此壯夫義
士所以竊議而長歎者也雖樹下不言用歸功于明主
然策勲有典何勸善于戎臣敢憑下問是用大陳其所
正復州縣招撫歸降補署官僚存集流迸擒殺凶醜收

張燕公集

卷十

五

獲軍寔與吏士共功者俱如別狀

賀彩雲見狀

右伏奉恩旨今日属下元賜臣等侍從升降聖闕禮謁
大聖尊容行香之際日西南有彩雲見者伏以大道無
形至誠斯應上元降福感而遂通步輦陟於齋宮虔修
香火彩雲生于曉日遽發祥光是知聖德與天心合符
萬靈與羣仙叶贊臣叨陪侍從如昇汗漫之遊承恩禮
謁更覩氤氳之瑞榮幸之極于載一時無任欣慶之至

賀破吐蕃狀

右臣等伏以涼州遙稟神算大振天威吐蕃小醜應時
摧敗元惡渠魁乘勢俘戮隻輪匹馬坐見無遺雖虞舜
之格有苗黃軒之征涿鹿未有廓清氛祲如今日之盛
者臣等無任慶快之至

謝賜撰鄭國夫人碑羅絹狀

右內侍尹鳳祥宣口勅得所進鬪羊表及鄭國夫人碑
今賜卿綵羅二十四疋絹一千匹鬥羊簿技恩感戰士之
心雕蟲陋詞媿稱賢母之德効輕賞重戴厚慚深臣子
之情豈望天報

張燕公集

卷十

六

集賢院謝示道經狀

右臣伏見聖札金字八分寫道經兩卷以爲惠文太子
三七追福天臺發彩宸翰騰輝色麗風雲光逾日月伏
惟陛下孝弟之至通于神明俯念天倫用資幽贊當茲
炎暑服此勤勞事絕古今感深名教臣忝司舊職載考
前王未有親親之至楷隸之美如此之備也足以作則
貽範垂之無窮伏望宣付史館以光典策無任誠懇慙
惶之至

謝賜御書大通禪師碑額狀

右內侍尹鳳祥宣示御書大通禪師碑額六字畫起平
雲點蹲芒玉戈矛攢倚鸞鶴交飛神功發于至想睿思
成于元德實謂天龍捧持虛空稱贊逝者如在薦福知
歸臣栖志禪門撰碑靈塔幸遇聖情崇道御書假貸刻
星辰于嘉石爛日月于封邱感極悲生恩深無荅臣無
任望外殊澤之至

謝賜藥狀

右內史陳忠盛宣旨賜臣痢藥臣攝生無方自貽疾疢
聖慈矜憫垂恩救護氣衰力憊忽吞永命之符腸滑胃
虛更餌返魂之草蒙天營祐指日痊平雖萬粉灰何酬
造化謹附忠盛奉狀陳謝以聞

對策

詞標文苑科策

第一道

臣聞舜命昌言漢徵極諫嘗覽千古賢哉二君今陛下
發德音下明制選空岩穴訪匝輿臺大哉邈乎過之遠
矣臣以草莽之賤謬當車乘之招誠不足以庶幾王庭
充塞大邑伏讀聖旨乃知天心之所存焉臣聞昔者烏

跡代繩龍文演卦水土遷王時更萬祀金木互興人非
一姓暨乎三皇五帝氏往夏商周漢氏作或導人以禮
樂或驅俗以政刑或革弊以忠敬或治風以文武非師
古之誥有殊蓋隨時之義且異也伏惟聖母神皇陛下
誕受鴻基光膺駿命粵若立極格天之業論道布政之
典任賢克暴之功出洛卿雲之端此并藏緯玉冊勒休
金版鬱美前古揚光後葉者矣至若創業垂統之則宏
猷永圖之美重光三聖再清六合可不謂然乎猶或惕
慮推溝勞謙馭朽謝文明于薄德想疇庸于清問此陛

張嶽公集

卷十一

八一

下之至讓也愚臣何足以知之策曰適時之務何先經
國之圖何最臣聞古者因人以立法乘時以設教以義
制事以禮制心夫人者理得則氣和業安則心固崇讓
則不競知恥則遠刑若強人之所不能雖令不勸禁人
之所必犯雖罰且違故曰政不欲煩煩則數改數改無
定人懷苟免之心網不欲密密則深文深文多傷下有
非辜之懼竊見今之俗吏或匪正人刻刻爲明以苛爲
察以剝下爲利以附上爲誠綜覈之司考課專丁刀筆
撫字之宰職務具爲簿書陛下日昃雖勤守宰風化多

闕臣以爲將行美政必先擇人失政謂之虐人失人謂之傷政捨人爲政雖勤何爲伏願陛下進經術之士退掊克之臣崇簡易之化流愷悌之風畫一成歌此適時之務也慎賢而用此經國之圖也苟能英才不棄大化方隆而猶曰朝謝垂衣野非擊壤則文武之道尚何言哉堯舜之君徒虛語耳策曰帝皇之道奚是王霸之理奚非者布在方策臣聞之矣聖人御歷上淳而下信帝者應期君明而臣哲周用王道教化一而人從漢雜霸政刑政嚴而俗僞故親譽優于畏侮文章劣于成康臣

張燕公集

卷十

九

謹對

第二道

臣聞刑以助教德以閑邪先王慎于好生大易誠于緩死今陛下母臨黔首子育蒼生孚佑下人克配上帝然有東南小禮荆蠻遠郊雖聖德並辜尙用防風之戮天心罪己仍勞淮甸之征具有註誤閭閻脅從并邑陛下愍孤霜于海淮恤困窮于江漢捨從寬宥此陛下之恩也而叢爾餘孽蠢茲頑兇思弄兵于潢池之下將構難于戎狄之域罪盈稔貫禍得萌芽此又陛下之明也今

陛下乃賜臣策曰豈止殺之方乖于折衷將小慈之澤
爽彼大猷臣實見折衷大猷之規不知小乖微爽之義
也策曰刑政之要寔所明閑臣聞政猶水火刑譬陰陽
頃者三監亂常有司旣糾之以猛于今四罪咸服陛下
宜濟之以寬明肆赦之渥恩安萬人之反側布深仁于
羅鳥收至察于泉魚豈不大哉天下幸甚且夫人者眊
也暗而不可罔庶者衆也愚而不可欺是故刑在必登
不在必慘政在必信不在必苛故明王之理天下也刑
一則人畏而不干政簡則俗齊而不僞於是禍亂不作
災害不生君安于上臣悅于下百姓日用而不知其然
四海風動惟帝之則道暢鍾石聲流舞詠其行已也非
他所理者以此刑政之要庶幾一隅臣謹對

第三道

伏惟陛下則天法地畏命重人據河洛之規模總風雨
之交會軒后魚圖之水建邦設都周公龜墨之地考堂
作室靈祇降福嘉祥薦祉制同神造力以子來將以殷
薦上帝至法也嚴配先王至孝也加以八風攸序四時
克諧無得而稱能事畢矣猶復執勞謙之不已懼盛禮

之未宏訪末學之臣詢稽古之政斯事體大臣何足言
然而敢不欽承以竭涓滴即策曰何代之政參詳適中
何禮之規施用爲切臣謹錯綜三五明徵典謨竊以緯
武經文布方策而非遠英風顯號流頌聲而可襲未有
反義悖德而致拜平之改棄禮違經克以永終之祿莫
不發號施令法乾坤之動靜執契際衡順金木之刑政
是故青陽元室遵孟仲而觀風白輅朱旂因離光而布
政養老用上庠之禮教胄取大學之義環水著辟雍之
名向陽表明堂之位蓋所以享羣瑞朝諸侯頒正朔調

張燕公集

卷十

二

景緯成簡易之基崇久大之業也皇王奧旨庶此詳探
周漢前蹤難于專用臣才智鶩劣草莽鱗生至如軍國
務廣政刑理急但至敬無文信言不美陛下欲聽其說
必觀于事將達其謀先求諸道危言抵禁破膽寒心伏
惟聖主稍留天聽臣謹對

批答

答宰臣賀破賊狀

省表具知蠢茲戎狄侵軼邊鄙不交鋒刃自斯破也既
邊將之功亦天道所棄心之有慰與卿同之



張燕公集

卷十

七

臣秦恩復恭校

秦恩復恭校

